

# SKIPULAGSSKRÁ

## Landgræðslusjóðs.

### 1. gr.

#### *Nafn og lögheimili.*

Sjóðurinn heitir Landgræðslusjóður. Sjóðurinn er sjálfseignarstofnun og starfar samkvæmt lögum nr. 19/1988. Lögheimili hans er í Reykjavík.

### 2. gr.

#### *Stofnendur.*

Sjóðurinn var stofnaður fyrir atbeina landsnefndar lýðveldiskosninganna og forgöngu Skógræktarfélags Íslands, samtímis atkvæðagreiðslunni 20.-23. maí 1944, til minningar um stofnun lýðveldis á Íslandi.

### 3. gr.

#### *Merki sjóðsins.*

Merki sjóðsins er bjarkarlaufin þrjú, sem landsnefnd lýðveldiskosninganna notaði kjördagana og afhenti síðan Skógræktarfélagi Íslands að gjöf.

### 4. gr.

#### *Stofnfé.*

Stofnfé sjóðsins var:

- |  |                    |
|--|--------------------|
| a) Frjáls framlög er söfnuðust   | kr. 130.000        |
| b) Eftirstöðvar þess fjár, sem landsnefnd lýðveldiskosninganna barst frá nokkrum stofnunum, til þess að standa straum af kostnaði í sambandi við lýðveldiskosningarnar | <u>kr. 250.000</u> |
|  | kr. 380.000        |

Núvirði stofnfjár miðað við breytingar á vísitölu neysluverðs frá maí 1944 til júlí 2017 er kr. 32.921.669.

### 5. gr.

#### *Aflafé.*

Tekjur sjóðsins eru:

- I. Framlög og söfnunarfé.
- II. Gjafir frá einstaklingum og fyrirtækjum.
- III. Vextir og arður af eigin fé.

### 6. gr.

#### *Markmið.*

Verksvið sjóðsins er að stuðla að landgræðslu og gróðurvernd, en meginmarkmið hans skal þó vera að taka þátt í og styrkja verkefni á sviði skógræktar, einkum á vegum aðildarfélaga Skógræktarfélags Íslands.

### 7. gr.

#### *Stjórn sjóðsins.*

Stjórn Landgræðslusjóðs skal skipuð 5 einstaklingum. Stjórn Skógræktarfélags Íslands kýs úr sínum hópi tvo fulltrúa til eins árs í senn og tvo til vara. Aðalfundur Skógræktarfélags Íslands kýs einn fulltrúa til eins árs í senn og einn til vara. Má sá hvorki vera í aðal- né varastjórn Skógræktarfélags Íslands. Auk þess eiga skógræktarstjóri og landgræðslustjóri sæti í stjórninni og tilnefna þeir varamenn í forföllum sínum. Stjórnin skiptir með sér verkum. Formaður skal vera einn af fulltrúum Skógræktarfélags Íslands. Framkvæmdastjóri Skógræktarfélags Íslands hefur rétt til setu á stjórnarfundum Landgræðslusjóðs með málfrelsi og tillögurétt.

## 8. gr.

*Ársreikningar.*

Stjórnin leggur starfsskýrslu og ársreikninga sjóðsins fyrir aðalfund Skógræktarfélags Íslands. Reikningarnir skulu staðfestir af löggiltum endurskoðendum og sendir Ríkisendurskoðun ásamt starfsskýrslu.

## 9. gr.

*Fjárvarsla.*

Stjórnin sér um varðveislu eigna og ávöxtun á fé sjóðsins. Hún skal leitast við að tryggja sem besta ávöxtun á hverjum tíma án þess að stofna fé sjóðsins í hættu og gæta þess að eignir skili eðlilegum arði. Eigið fé sjóðsins samkvæmt ársreikningi fyrir árið 2016 nam kr. 367.523.890. Eigið fé er óheimilt að skerða.

## 10. gr.

*Úthlutun styrkja.*

Sjóðstjórn setur reglur um umsóknir og úthlutun styrkja í samræmi við markmið sjóðsins og ákveður upphæð þá er úthluta skal hverju sinni og sérstök skilyrði henni tengd.

Árlega skal reikna raunvexti samkvæmt lið III í 5. gr. og er stjórn heimilt að verja allt að 90% þeirra til að framfylgja markmiðum sjóðsins. Að lágmarki skulu 10% raunvaxta leggjast við höfuðstól.

Við úthlutun og mat á umsóknum skal helst tekið tillit til gildis verkefnisins, framkvæmda- og kostnaðaráætlunar, sem og umhverfislegra þátta. Heimilt er að veita styrki til verkefna sem unnin eru í samstarfi við aðra, en þá skal umsækjandi gera sérstaka grein fyrir öðrum styrktaraðilum.

Styrkþegar skulu gera sjóðnum grein fyrir framgangi verkefna eftir reglum þeim sem sjóðurinn ákveður hverju sinni. Ef styrkþegar vanrækja þessa skyldu eða framkvæmdaáætlun er ekki haldin, getur sjóðstjórnin dregið styrkveitingu til baka tímabundið eða endanlega.

Verði árlegu ráðstöfunarfé ekki öllu varið í samræmi við framanskráð skal afgangur þess leggjast við höfuðstól.

## 11. gr.

*Rekstur.*

Stjórnin skal fyrir ár hvert gera fjárhagsáætlun fyrir sjóðinn. Allur rekstrarkostnaður greiðist úr sjóðnum.

## 12. gr.

*Gerðabók.*

Stjórn sjóðsins skal halda gerðabók þar sem skráðar skulu fundargerðir stjórnarfunda. Þar skal einnig skrá öll erindi sem berast stjórn og með hvaða hætti þau eru afgreidd.

## 13. gr.

*Skipulagsskrá.*

Skipulagsskrá sjóðsins má því aðeins breyta, að meirihluti stjórnar sjóðsins sé því samþykktur og breytingarnar hljóti auk þess samþykki næsta aðalfundar Skógræktarfélags Íslands með þremur fjórðu hlutum greiddra atkvæða. Bera skal breytingar á skipulagsskránni skriflega undir embætti sýslumannsins á Norðurlandi vestra.

Með skipulagsskrá þessari fellur úr gildi skipulagsskrá fyrir Landgræðslusjóð nr. 932 frá 5. desember 2001. Leita skal staðfestingar sýslumannsins á Norðurlandi vestra á skipulagsskrá þessari.

Nr. 920

18. október 2017

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

*Sýslumaðurinn á Norðurlandi vestra, 18. október 2017.*

**Bjarni Stefánsson.**

\_\_\_\_\_  
*Auður Steingrimsdóttir.*

\_\_\_\_\_  
B-deild – Útgáfud.: 2. nóvember 2017